

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : JAWAB LISAN**  
**DARIPADA : DATO' HASBULLAH BIN OSMAN**  
**[GERIK]**  
**TARIKH : 23.10.2019 (RABU)**  
**SOALAN : 16**

minta **MENTERI PEMBANGUNAN LUAR BANDAR** menyatakan apakah perancangan baru dalam memperkasakan ekonomi masyarakat luar bandar serta mempertingkatkan lagi peluang pekerjaan di kalangan anak-anak muda dan berapakah statistik terkini kadar migrasi golongan muda dari luar bandar ke bandar kerana peluang pekerjaan.

**JAWAPAN:**

Tuan Yang di-Pertua,

1. Berdasarkan Laporan Survei Migrasi Malaysia, 2018 oleh Jabatan Perangkaan Malaysia, kadar migrasi dari luar bandar ke bandar bagi tahun 2018 adalah 4.8% berbanding 15.2% pada tahun 2016. Pada masa yang sama, kadar migrasi dari bandar ke luar bandar adalah 19.5% (2018) berbanding 4.2% (2016). Lebih daripada satu pertiga daripada migrasi dalaman adalah dari kumpulan umur 25 hingga 34 tahun (34.3%) dan kumpulan umur 15 hingga 24 tahun (26.2%). Mengikut keluarga merupakan sebab utama migrasi iaitu 44.2%, diikuti dengan kerjaya (24.3%) dan persekitaran (22.4%).
2. KPLB sentiasa memberi perhatian terhadap pemerkasaan ekonomi masyarakat luar bandar melalui peningkatan peluang pekerjaan kepada penduduk seterusnya memastikan jurang pendapatan antara luar bandar dan bandar dapat dikurangkan. Antara program baharu yang dilaksanakan adalah:

- (a) **Projek Bersepadu Pembangunan Ekonomi Kampung (PROSPEK)** iaitu program pembangunan ekonomi kampung secara *in-situ* dengan membangunkan tanah sedia ada dan tanah terbiar untuk aktiviti ekonomi seperti pertanian, penternakan dan perladangan berdasarkan *niche/ signature product* di perkampungan berkenaan.
- (b) **Program Desa Harapan** yang merupakan jalinan kerjasama antara KPLB dengan pihak swasta/ badan korporat dengan matlamat untuk menjana pendapatan dan mewujudkan peluang pekerjaan kepada masyarakat luar bandar khususnya belia melalui sokongan dan bantuan dalam aspek sosioekonomi, pendidikan dan kualiti hidup penduduk luar bandar.
- (c) **TVET@KPLB** menawarkan peluang latihan teknikal dan vokasional (TVET) kepada golongan belia menerusi 274 buah Institusi Pendidikan TVET@KPLB yang dikawal selia oleh MARA, KEMAS, KEDA dan PERDA. Program ini bertujuan untuk meningkatkan kemahiran kumpulan sasar supaya mereka mampu mendapat pekerjaan atau mengusahakan perniagaan sendiri serta boleh menjana pendapatan yang lebih tinggi.
- (d) **Pelbagai Program Keusahawanan** yang dilaksanakan oleh KPLB dan agensi di bawah KPLB. Antaranya program HIT Barber, MARA in Fashion (MIF), Gate to Global (GTG) dan Beauty in Business (Biss).
3. Kementerian juga sedang memberi penumpuan dalam membangunkan 28 daerah dengan pendapatan purata bulanan isi rumah di bawah RM 4 ribu berdasarkan Laporan Penyiasatan Pendapatan Isi Rumah dan Kemudahan Asas Mengikut Negeri dan Daerah Pentadbiran 2016 yang dikeluarkan oleh Jabatan Perangkaan Malaysia. Usaha ini akan melibatkan pelaksanaan program/ projek KPLB yang berbentuk pembangunan fizikal, ekonomi dan modal insan yang boleh meningkatkan kesejahteraan penduduk di daerah berkenaan dan seterusnya mengeluarkan daerah tersebut daripada kemiskinan.

4. Disamping itu, KPLB telah melancarkan Dasar Pembangunan Luar Bandar yang akan menjadi hala tuju baharu bagi pembangunan ekonomi dan keusahawanan yang menyeluruh di luar bandar. Pada masa sama, Kementerian sedang meneliti program-program baharu yang lain untuk dilaksanakan dalam Rancangan Malaysia Ke-12, khususnya untuk meningkatkan pendapatan golongan belia di luar bandar.

Sekian, terima kasih.